

共同經課 - 1

撒母耳記上一章四節~二十節

4 Í-lī-ka-ná 獻祭 ê 日，分祭肉 hō伊 ê bó Pi-ní-ná，kap 伊 ê kiá" cha-bó-kiá"；5 總是分 hō Hap-ná ê 是雙份，因為伊疼 Hap-ná；若是耶和華關密伊 ê 胎。6 Kap 伊做對頭 ê Pi-ní-ná 大大激伊，beh hō伊憂悶；因為耶和華關密伊 ê 胎。7 伊上到耶和華 ê 厝 ê 時，Í-lī-ka-ná 年年 án-ni 行，Pi-ní-ná 猶原激伊；伊就啼哭，續 m̄食。8 伊 ê 丈夫 Í-lī-ka-ná kā 伊講，Hap-ná ah，你啥事啼哭？啥事 m̄食？啥事心憂悶 ah？我 tùi-tī 你 kiám 無比十個 kiá" khah 好 mah？9 In tī Sī-ló lim 食了後，Hap-ná 就起來。祭司 Í-lī tī 耶和華殿 ê 門 khiā 邊坐 tī 伊 ê 位。10 Hap-ná ê 心內憂苦，祈禱耶和華來大啼哭；11 下願講，萬軍 ê 耶和華 ah，你若果然垂落看顧你 ê 女婢 ê 艱難，koh siàu 念我，無 boē 記得你 ê 女婢，賞賜你 ê 女婢生 ta-po-kiá"，我 beh hō伊歸 tī 耶和華到一世人，剃頭刀無到伊 ê 頭殼。12 Hap-ná tī 耶和華 ê 面前直直祈禱 ê 時，Í-lī 注目看伊 ê 嘴。13 Ta" Hap-ná 心內靜靜求，只有嘴唇振動，無聽見聲；所以 Í-lī 掠做伊是酒醉。14 Í-lī kā 伊講，你 beh 醉到 tī 時 ah？你 m̄-thang koh lim 酒。15 Hap-ná 應講，我 ê 主 ah，m̄是 án-ni；我是心內憂苦 ê 婦人人，薄酒厚酒我 lóng 無 lim；獨獨 tī 耶和華 ê 面前吐出心情；16 莫得掠你 ê 女婢做 phái" 德行 ê 婦女，因為我到 ta" tùi 我 ê 大憂悶受激氣來講。17 Í-lī 應伊講，你 thang 平安 tò 去；願以色列 ê 上帝允准你所對伊求 ê。18 Hap-ná 講，願你 ê 女婢得 tiòh 恩 tī 你 ê 面前。婦人人就 tò 去，來 lim 食，就無 koh 再帶憂容。19 隔日 in 早早起來，tī 耶和華 ê 面前敬拜，就 tò 去 Láh-má，到伊 ê 家。Í-lī-ka-ná kap bó Hap-ná 同房；耶和華 siàu 念 Hap-ná。20 Hap-ná 就懷孕；到時就生一個 kiá"，kā 伊號名叫撒母耳，講，這是我對耶和華求 ê。

共同經課 - 2

詩篇一百一十三篇

1 Lín tiòh o-ló 耶和華。耶和華 ê 奴僕 ah，lín tiòh o-ló，O-ló 耶和華 ê 名。2 願耶和華 ê 名受 o-ló，Tì chit 時到永遠。3 Tùi 日出到日落 ê 所在，耶和華 ê 名是應該 o-ló-ê。4 耶和華 poà" 過 lóng 總 ê 國，伊 ê 榮光 khah 高 tī chiah-ê 天。5 Chī-chūi 親像耶和華咱 ê 上帝 ah？伊坐 tī 至高 ê 所在 ê。6 伊家已謙卑，觀看天頂地下 ê tāi-chi。7 伊 tùi 塵埃舉起 sòng-hiong 人，Tùi 糞埤堆提拔欠缺 ê 人；8 Hō伊 kap 貴族相 kap 坐，就是 kap 本國 ê 貴族相 kap 坐。9 伊 hō boē 生育 ê 婦人人料理家；做 choē-choē kiá" ê 老母來歡喜。Lín tiòh o-ló 耶和華。

共同經課 - 3

希伯來書十章十一節~十四節、十九節~二十五節

11 Koh 見若祭司 ták 日 khiā-teh 來服事，táuh-táuh 獻 hiah-ê 相同 ê 祭，就是永永 boē 會除去罪 ê；12 獨獨基督，既然獻一個祭到 tī 永遠，就坐 tī 上帝 ê 大 pêng；13 以後 thèng 候伊 chiah-ê 對敵 hē 做伊 ê 腳踏椅。14 因為伊用一 pái 獻祭，hō chiah-ê 成聖 ê 人永遠做完全。19 所以兄弟 ah，咱 tī 耶穌 ê 血既然得 tiòh 好膽入聖所，20 tùi 伊所 kā 咱開新 kap 活 ê 路，àn 帳籬經過 ê，chit-ê 帳籬就是伊 ê 身體；21 koh 既然有大祭司治理上帝 ê 家；22 咱 tiòh 用真實 ê 心，充滿 ê 信，心已經受 hiù，免 hō 良心責備，身軀亦已經受清水洗，來親近上帝。23 咱所 òng 望 ê，已經有承認，ta" tiòh 堅固 chit-ê 承認無搖動；因為 hit-ê 應允咱 ê 是信實；24 koh tiòh 大家相眷顧，來激起仁愛 kap 行好；25 m̄-thang 放 soah lín ê 聚會，親像有人慣勢 án-ni，就是 tiòh 相勸勉；既然看見 hit 日近，koh-khah tiòh án-ni。

共同經課 - 4

馬可福音十三章一節~八節

1 耶穌出殿 ê 時，有一個學生 kā 伊講，先生，你看 leh，chit 號石，chit 號厝宅！2 耶穌 kā 伊講，你看 chiah-ê 大厝 mah？Tī chia beh 無一塊石留 tī 石 ê 頂面，也無 chia 落去。3 耶穌 tī 橄欖山坐 tī 殿 ê 對面；彼得、雅各、約翰 kap 安得烈暗靜問伊講，4 請 kā 阮講，甚麼時有 chiah-ê 事？Koh chiah-ê 事 beh 成 ê 時有甚麼兆頭 ah？5 耶穌 chiah kā in 講，Lín tiòh 謹慎，莫得 hō 人迷惑。6 Beh 有 choē-choē 人託我 ê 名來講，我就是基督，來迷惑 choē-choē 人。7 Koh lín 聽見交戰 kap 交戰 ê 風聲 ê 時，莫得驚；因為 chiah-ê 事的確有，總是末期 iáu-bē 到。8 因為百姓 beh 起來攻擊百姓，國也 beh 攻擊國；ták 所在 beh 有地動，也 beh 有飢荒；chiah-ê 事就是苦痛 ê 起頭。